

आकाशवाणी

खबरां पंकज कोहली कोला

- प्रधानमंत्री नरेन्द्र मोदी अज्ज कर्नाटक दे दौरे पर होगन, ओ बेंगलुरु च 3 वंदे भारत रेलें गी झंडी दस्सियै रवाना करगन।
- चुना आयोग नै 334 पंजीकृत गैर-मानता हासल राजनीतिक पार्टियें गी अपनी सूची थमां हटाई दिता ऐ।
- भारत नै अलास्का च अमरीकी-रुस शिखर सम्मेलन दा सोआगत कीता, युक्रेन च अमन रमानदारी दी मेद जताई।
- बांग्लादेश दे मुख चुना आयुक्त नै दस्सेया जे उत्थें अगले बरे फरवरी महीने 13में राष्ट्री चुना करोआए जागन।
- ते क्वांटबाक्स चेन्नेई ग्रैंड मास्टर च अर्जुन एरिगेसी दुई थाहरै पर बरकार, कीमर सब्भनै शा अगगे।

<><><><><><>

PM Karnataka Visit

प्रधानमंत्री नरेन्द्र मोदी होर अज्ज कर्नाटक दे इक्क दिने दे दौरे पर होगन। श्री मोदी बेंगलुरु च KSR रेलवे स्टेशन थमां 3 “वंदे भारत” एक्सप्रेस रेलें गी झंडी दस्सियै रवाना करगन। इन्दे च बेंगलुरु थमां बेलगावी, अमृतसर थमां श्री माता

वैष्णो देवी कटरा ते नागपुर थमां पुणे जाने आहलियां रेलां शामल न। एदे मगरा प्रधानमंत्री बेंगलुरु मेट्रो दी येलो लाईन दा उदघाटन करगंन ते RV रोड रागीपुड्डी थमां इलैक्ट्रानिक सिटी मेट्रो स्टेशन तग्गर मेट्रो दी सवारी बी करंगन। उन्दा बेंगलुरु च शैहरी सम्पर्क परियोजनाएं दा उद्घाटन ते नीह पत्थर रक्खने मगरा इक अवामी बैठक गी सम्बोधित करने दा बी कार्यक्रम ऐ। इस दौरान श्री मोदी 15 हजार 610 करोड़ रुपे शा बद्ध दी लागत आहली बेंगलुरु मेट्रो दे त्रियें गेड़ दी परियोजना दा नीह पत्थर रक्खगंन। इस परियोजना दी कुल लंबाई 44 किलोमीटर थमां बद्ध होग ते एदे च 31 एलिवेटेड स्टेशन होगंन।

<><><><><><>

PM -J&K

प्रधानमंत्री नरेन्द्र मोदी होरें कश्मीर घाटी च पैहली मालगड्डी दे पुज्जने दी सराहना कीती ऐ जेड़ी इस क्षेत्र गी राष्ट्रीय माल-ढोआई नेटवर्क कन्नै जोड़ने च एक महत्वै आहला मील दा पत्थर ऐ। केन्द्रीय रेल मंत्री अश्विनी वैष्णव हुन्दी इक सोशल मीडिया पोस्टर पर प्रतिक्रिया दिंदे होई प्रधानमंत्री होरें गलाया जे एह जम्मू-कश्मीर च बपार ते सम्पर्क लेई इक बड्डा ध्याड़ा ऐ ते एह विकास ते प्रगति ते समृद्धि दवै गी बधाग। इस उदघाटन यात्रा नै 18 घंटे शा बी घट्ट समें च तकरीबन 600 किलोमीटर दा घंटा तय कीता।

<><><><><><>

ECI

चुना आयोग दा गलाना ऐ जे उनें 334 पंजीकृत गैर-मानता हासल उनें सियासी दले गी अपनी सूची थमां हटाई दिता ऐ, जेड़े 2019 थमां हुन तग्गर 6 बरें च इक्क बी चुना लड़ने दी लोड़चदियें शर्ते गी पूरा नैई करी पाए न। इनें दले दी थाहर शनाख्त नैई होई सकी ऐ। ए 334 पंजीकृत गैर-मानता हासल राजनीतिक दल देस-भर दे बक्ख-बक्ख राज्यें ते केन्द्र शासित प्रदेशें कन्नै सरबंघ न।

देसै दे राष्ट्री राजनीतिक दल, मकामी राजीनतिक दल ते पंजीकृत गैर-मानता हासल राजनीतिक दल जन-प्रतिनिधित्व अधिनियम दे प्रावधानें तैहत निर्वाचन आयोग च पंजीकृत न।

<><><><><><>

India-US –Russia Understanding

भारत नै, अमरीका ते रूस बश्कार 15 अगस्त गी अलास्का च होने आहली बैठक दा सोआगत कीता ऐ। विदेश मंत्रालय नै इक्क ब्यानै च आक्खेया ऐ जे ए बैठक रूस ते युक्रेन बश्कार जारी संघर्ष गी खत्म करने ते अमन-रमान दारी स्थापित करने बक्खी महत्वै आहली गें ऐ। ब्यान च आक्खेया गया ऐ जे प्रधानमंत्री नरेन्द्र मोदी होरें नेकें बारी आक्खेया ऐ जे ए जंग आहला जुग नैई ऐ, इस करियै भारत दौनें देसें बश्कार होने आहली बैठक ते अमन-रमानदारी लेई कीती जा रदियें कोष्टें दा समर्थन करदा ऐ।

<><><><><><>

ED -Vadra

प्रवर्तन निदेशालय नै विशेष अदालतै गी दस्सेया जे गुरुग्राम च विवादित ज़मीन सोदे आहले मामले च कांग्रेस सांसद प्रियंका गांधी वाड्रा दे घरेआले ते कारोबारी राबर्ट वाड्रा गी अपराध दी आय दे तौरा पर 58 करोड़ रुपे थोए न, जेल्लै के 53 करोड़ रुपे स्काईलाइट हास्पिटैलिटी राय ते 5 करोड़ रुपे ब्लू ब्रीज़ ट्रेडिंग राय भेजे गेन। दिल्ली दी विशेष PMLA अदालतै कारोबारी राबर्ट वाड्रा गी नोटिस जारी करियै 28 अगस्त गी जवाब मंगेया ऐ।

<><><><><><>

Bangladesh CEC

बांग्लादेश दे मुख् चुना आयुक्त AMM नसीरुद्दीन होरें आक्खेया ऐ जे 13मीं जातिय संसद दे चुना अगले बरे फरवरी महीने दे पैहले पखवाड़े च करोआए जागंन। उनें गलाया जे चुना शा दो-महीने पहले इस बरे दिसम्बर च चुनावी कार्यक्रम दा ऐलान कीता जाई सकदा ऐ। उनें आक्खेया जे आयोग सुतंतत्र ते निरपक्ख चुना यकीनी बनाने लेई मुत्तलका अधिकारियें कन्ने रलियै कम्म करा करदा ऐ।

<><><><><><>

Guj-World Lion Day

अज्ज शेर दिवस ऐ। गुजरात, एशियाई शेरें दी राक्खी-हिफाजत च इक्क महत्वै आहली थाहरै दे तौरा पर मशहूर ऐ। पोरबंदर कश वर्धा जंगली जी अभ्यारण्य पारिस्थितिकी ते शेरें दे विकास बक्खी लगातार कम्म करदे होई तरक्की करा करदा ऐ। गुजरात च 2025 च शेरें दी गिनतरी कीती गई ही, जेदे थमां पता लग्गा ऐ जे राज्य च 891 शेर न ते वर्धा अभ्यारण्य शेरें दी राक्खी हिफाजत दे मामले च गिर अभ्यारण्य थमां अग्गे ऐ।

<><><><><><>

Temple Gate Collapse

नागपुर दी कोराडी थाहर महालक्ष्मी जगदम्बा देवस्थान दे चला रदे गेट दे निर्माण कम्म दा जंदी संजा स्लैब ढेई पौने करी 17 लोकें दे घायल होने दी खबर ऐ। एह घटना राती 8 बजे होई, अधिकारियें मुजब बचाव कम्म फौरी तौरा उप्पर शुरु करी दिता गया ऐ। घायलें गी बक्ख-बक्ख अस्पतालें च भर्ती कराया गया ऐ।

<><><><><><>

Chess

दुनिया दे पंजमें नम्बर दे भारतीय Grandmaster Arjun Erigaisi होरें कल Quantbox चेन्नई Grandmaster टूर्नामेंट दे त्रीये राउंड मगरा अमरीकी

Grandmaster Ray Robson गी हराइयै जर्मनी दे Vincent Keymer मगरा इक्कलै दूई थाहर उप्पर कब्जा जमाई लेया ऐ। इस प्रतियोगिता दे 6 राउंड अजे बकाया न। एरिगैसी दे 2.5 अंक न जदके कीमर 3 अंके कन्नै शीर्ष उप्पर न।

<><><><><><>

Sikkim -HGT

सिक्कम सरकार “हर घर तिरंगा” अभियान दे जश्न गी पूरे जोश कन्नै मनाने लेई लोड़चदी गें पुट्टा रदी ऐ। संस्कृति विभाग दे इक वरिष्ठ अधिकारी नै दस्सेया जे इक लक्ख राष्ट्रीय झंडे लोकें गी दिते जागंन। संस्कृति विभाग नै झंडे जिला प्रशासन गी सौंपे न तां जे सब्भनै लोकें तगर तिरंगा पुजाया जाई सकै।

<><><><><><>

India Rugby

बिहार दे राजगीर च खेडी जा रदी एशिया रगबी -Under -20 प्रतियोगिता-Seven च भारतीय महिला टीम नै शानदार प्रदर्शन करदे होई जीत हासल कीती ते सैमिफाईनल च अपनी थाहर पक्की करी लेई। अपने पैहले मैच च कजाकिस्तान गी हराने मगरा भारतीय कुड़ियें दुए मुकाबले च UAE गी हराई दिता। इस जीत ने टीम गी हांगकांग चीन दे खिलाफ अखीरी पूल शा पैहले सैमिफाईनल च थाहर हासल कराई दिती।

<><><><><><>

IMD Weather

मौसम विभाग नै अगले हफ्ते उत्तराखंड ते हिमाचल प्रदेश च मौलेधार बरखा बरने दी पेशगोई कीती ऐ। मैहकमे नै अगले 6-7 दिनें दौरान हिमालय दे तराई आहले इलाके, पश्चिम-बंगाल, असम, सिक्किम, बिहार, मेघालय ते अरुणाचल प्रदेश च बी इस्सै चाल्ली दे हालात बने रौहने दा अंदाजा लाया ऐ। विभाग मुताबक तटीय आंध्र-प्रदेश, हरियाणा, चंडीगढ़, दिल्ली, नागालैंड, मणिपुर, मिज़ोरम, त्रिपुरा, पंजाब, तामिलनाडु, पुडुचेरी, कराईकल, UP, तेलंगाना ते पश्चिम MP च अज्ज तेज बरखा बरी सकदी ऐ।

<><><><><><>

Uttarakhand-Rescue Operation

उत्तराखंड च उत्तरकाशी जिले दे हरसिल ते धराली क्षेत्रें च हाल च गै आई दी आपदा मगरा बड्डे पैमाने पर राहत ते बचाव कम्म जारी ऐ। उत्तराखंड दे मुख सचिव आनंद बर्धन होरें सब्भनें सरबंध्यत एजेंसियें गी आपसी तालमेल बनाइयै कम्म करने दे निर्देश दिते न। SDRF दे Inspector General Arun Mohan Joshi होरें गी चला रदे अभियानें लेई Nodal अधिकारी नियुक्त कीता गया ऐ।

<><><><><><>